

授堂金石文字續跋

授堂金石文字續跋卷七

偃師武億虛谷著

男穆淳編

孫未重校刊

後梁匡國軍節度使馮行襲德政碑

正書無年
月在許州

碑殘剝前列翰林學士奉旨及工部侍郎字案舊五代史
馮行襲傳太祖郊禋行襲請入覲貢獻巨萬恩禮殊厚尋
詔翰林學士杜曉撰德政碑以賜之此題翰林學士者卽
杜曉也歐史梁紀開平三年春正月辛卯有事於南郊後
書九月翰林學士充承旨工部侍郎杜曉同中書門下平
章事据是則碑之賜立有工部侍郎字必當正月後及曉
九月前未轉戶部時矣傳紀並言承旨碑作奉旨以避梁
祖嫌名故也又題朝議大夫前光祿口卿上柱國缺李宏

懿書體勢規步率更深入其奧然當時不聞以書名何哉
行襲傳薛史云武當人歐史云均州人証之碑所書家遷
武當世緒紛綸是薛史据其遷時占籍言之而唐書僖宗
紀光啓元年四月武當賊馮行襲陷均州逐其刺史呂煜
並與碑稱武當合矣然則歐史爲非實也碑載有口喜者
聚千人及軍吏迎謁公在側擊之卽傳言伏兵伺孫喜事
又載烏鵲啄食麥秀兩岐字卽傳言境內嘗大蝗尋有羣
烏啄食不爲害民或艱食必有稽穀出於隴畝是也然二
事之異皆由天幸撰碑者承錄以爲德政所被遂至史亦
從而書之蓋不悟其以詆訕相誣也

贈太尉葛從周神道碑

碑紀從周戰功有云落落領二千騎缺馬步二千殺戮殆

盡生擒落落奪馬三千歐史本傳書晉王怒自將擊從周

從周雖大敗而梁兵擒其子落落送于魏斬之予向跋此

深以見歐史之誤今案舊唐書羅宏信傳太原怒舉兵攻

魏營于觀音門外汴將葛從周援之屯于洹水李克用子

落落時爲鉄林軍使爲從周所擒唐書宏信傳從周爲關

竇每克用兵至輒出精卒薄戰必捷克用踰洹西北挑戰

從周大破之禽其子落落乃引去舊五代史從周傳乾寧

三年五月并帥以大軍侵魏遣其子落落帥二千騎屯洹

水從周以馬步二千人擊之殺戮殆盡擒落落于陣并帥

號泣而去紹威傳大祖遣葛從周援之戰于洹水擒克用

男落落以獻太祖令送于宏信斬之晉軍乃還推斯數証
舉足以見永叔曲說非信史矣碑云歸葬于偃師縣亳邑
鄉林口里之別墅今墓碑屹立如故而齊乘以東昌路之
聊城縣五代葛從周有墓土人名曰葛塊攷之未審貽此
誤也從周隸籍鄆城鄆與聊城相近當是其祖墓所在子
氏過信土人野夫之語豈非惑與

河東監軍張承業墓碑

同光元年勅立至元乙酉
重刻在交城縣洪橋村

碑先經焚後爲元張鼎新重勒立石已失書換人氏名今
以碑按五代史承業本傳事跡畧同其勸晉王驢周德威
退保高邑及與安金全破梁兵二事則各見德威金全傳
不具錄也承業歷官碑稱光啟中主邵陽軍事賜紫入爲

內供奉昭宗幸太原以爲河東監軍幸華州就加左監門
衛將軍莊宗爲晉王承制授開府儀同三司左衛上將軍
燕國公固辭不受但稱唐官終身今傳言初爲河東監軍
卒贈武衛上將軍略之甚矣舊五代史實取承業碑文書
官紀事皆與之同而自離石渡河凌晨躡冰而濟旋踵冰
解歐陽以其事詭異削之不書是也碑題稱貞憲公傳作
諡曰正憲舊史與歐陽史避仁宗諱易之

鉤大德塔銘

正書同光四年
二月在登封

銘前列京左街敬愛寺講維摩經沙門賜紫虛受撰後列
法孫欽緣書其文載行鈞俗姓閻氏鄭州陽武人年十有
四依會善寺西塔院法素禪師爲和尚年滿受具于本寺

瑠璃壇自後廣明庚子歲住少林寺於同光三年七月廿
日示滅春秋七十八僧臘五十九蓋行鈞實生于宣宗大
中二年戊辰其間所閱世變多矣京左街敬愛寺者五代
會要後唐同光三年詳定云近以中興大業以魏州爲
京與唐府權名東都爲京故此題云京也

後唐

重修古定晉禪院千佛邑碑

正書天成四年九月在武安縣

碑沙門宗仁撰下截已斷缺中言定晉禪院以同光元年
七月起功至天成元年九月落成又引集異記云魏時有
大業僧凭戶岩邊有大稠樹本堅枝密其僧將法衣往樹
欲掛其間忽爾開而集之儼然掩合神力彌縫乃婚媾長

于二子後之人因號桐禪師之寺焉又言收得道具數件
乃是桐禪師口脩所用之物有單梯一條坐禪棚一所椅
子一隻蓋一頂案牘餘業攷引丁晉公談錄寶儀雕起花
椅子二以備右丞及太夫人同坐王銍默記李後主入宋
後徐鉉見李取椅子相待以爲始自宋初不知後唐時已
有此坐具矣正名原始博稽當得其所自予故于此不敢
苟也

後晉

尊勝經幢

正壽

幢八面鐫字後題天福二年八月廿八日邑主住持僧等
諸名內惟二人題云焦長官焦校書五代時人多有此號

今獨施于二焦必其邑里之豪也又作四言數語類贊類
偈他經幢亦未見

羅周敬墓誌銘

正書天福三年十月
在洛陽東二十里鋪

誌石出土當庚戌歲七月洛水北溢冲激崖岸墓陷於水
惟石爲土人移置僅存予案誌文稱周敬曾祖讓皇檢校
司空累贈太師封南陽王薛史失其名歐史亦不著其官
階祖宏信皇天雄軍節度使檢校太師兼中書令長沙王
累贈守太師累封趙王諡曰莊肅薛史載宏信累官至檢
校太尉封臨清王歐史僅書爲節度使
新唐書宏信傳徙
臨清郡王又追封
北平王誌言紹威有子四人長廷規天雄軍節度副大使檢
校太傅駙馬都尉贈侍中次周翰義成軍節度檢校太傅

駙馬都尉次周胤前保大軍行軍司馬檢校兵部郎中兼御史大夫柱國賜紫金魚袋書官並較史爲詳然周翰史載爲宣義軍節度使誌稱爲義成職方考滑在梁稱宣義唐改爲義成周翰官於梁而誌以唐代遷易之鎮名書之於事爲失實次卽周敬字尙素初授檢校尙書禮部員外郎仍賜紫金魚袋權知滑州軍州事檢校禮部尙書尋授宣義軍節度檢校尙書右僕射薛史所云命爲兩使留後尋正授旄鉞正指其事而檢校尙書右僕射則無此文又移鎮許田加檢校尙書左僕射又授檢校司空守殿中監駙馬都尉薛史授秘書監與殿中監文亦小異入唐當莊宗時封開國侯加食邑三百戶明宗除右金吾大將軍充

街使遂轉左充使如故授匡國軍節度使加檢校司徒仍
賜耀忠匡定保節功臣加檢校太保除左監門衛上將軍
轉左領門衛上將軍轉左武衛上將軍入晉除右金吾上
將軍薛史載莊宗卽位歷左右金吾大將軍據誌文則莊
宗但封侯加邑明宗始除右金吾又轉左耳周敬在梁移
鎮許田史言忠武此亦唐改軍號而史以加於梁臣蓋錯
紀也史載長興中入爲左監門衛上將軍四遷諸衛上將
軍當以始除及入晉凡四遷而功臣賜號史不及之周敬
兄弟四人竟脫周亂不錄皆宜依誌文爲據周敬尙普安
公主兩史皆作普安與誌所書符誌前列朝請大夫行起
居郎充史館修撰柱國殷鵬撰并書薛史鵬字大舉大名

人爲右拾遺歷左補闕考功員外郎充史館修撰與此題合其階勲失書也又誌言周敬之墓在洛陽清封鄉積潤村今誌石所出直石嘴之西數十步蓋於墓地猶可攷而五代墟聚之名亦以附傳於後金石豈惟補史闕文哉

復溪州銅柱記

正書天福五年七月

碑前鐫天策府學士江南諸道都統掌書記通議大夫檢校尙書左僕射兼御史大夫上柱國賜紫金魚袋李宏皋撰宏皋卽馬希範依其父殷所置學士十八人之一也宏皋史皆作皋避宣祖諱刪之舊五代史希範傳晉天福中授江南諸道都統又加天策上將軍谿州洞蠻彭士愁寇辰澧二州希範討平之士愁以五州乞盟乃銘于銅柱希

範自言漢伏波將軍援之後故鑄銅柱以繼之

歐史漢州刺史彭士

然率銳獎諸蠻攻澧州希範遣劉勅劉全明等以步卒五千擊之士然大敗勅等攻溪州士然走獎州遣其子師焉率諸蠻酋降于勅溪州西接牂牁南林南通桂

林象郡希範乃立銅柱爲表命學士李皋銘之

今記文稱

我烈祖昭靈王漢建武十八年平徼側于龍編樹銅柱于

象浦是其事也記文吳任臣十國春秋全見宏皋傳案記

文五溪初寧傳作初輯式昭恩信傳作或昭恩德載叙厥

事傳作敬載厥事蓋聞牂牁接境盤瓠遺風因六子以分

居人五溪而聚族傳作牂牁接境五溪遺風泊師號精天

傳作師號滑服漢則宋均置吏稍靜溪山唐則楊思與師

遂開辰錦傳作宋均甫肇靖溪山楊興師遂開展境溪州

彭士愁傳作彭士然故能歷三四代長千萬夫傳歷作立

千作百亦不虐于小民記亦作必剽掠耕桑傳剽作擾
創丕基傳肇作大方振聲明傳明作名各請効命傳作各
効命土付以偏師傳付作士結寨馮高傳寨作阻固甘矜
甲豈暇投戈傳脫豈暇投戈惟作因甘矜恤彭師果作曷
崇侯感德以歸周傳作崇虎就加檢校太保傳無就字底
平彊理傳作居平荷君親之厚施傳作厚德垂于子孫傳
作予敢忘賢哲之蹤傳敢作可我王鎬柱庇黔黎傳我王
作誕今五溪之衆不足馮傳馮作平溪人畏威仍威惠傳
作思納質納質歸明求立誓傳作棄污歸口案任臣依記
文爲傳蓋未收銅柱元文所据名山記及廖道南楚紀或
近方志所載是以脫謬至此也記後勒誓詞與彭氏官屬

銜名任臣亦未收予具錄如左

誓文

天福五年正月十九日溪州刺史彭士愁與五姓歸明衆具件狀飲血求誓楚王畧其詞鑄銅柱之一隅右據狀溪州靜邊郡自古已來代無違背天福四年九月蒙王庭發軍收討不順之人當都願將本管諸團百姓軍人及父祖本分田場土產歸明王化當州大都三亭兩縣苦無稅課歸順之後請祇依舊額供輸不許管界團保軍人百姓不許亂入諸州四界劫掠該盜逃走戶人凡是王庭差網收買溪貨并都幕採伐土產不許輒有庇占其五姓生首州縣職掌有罪本都申上科懲如別無罪名請不降官軍攻

討若有違誓約甘請准前差發大軍誅伐一心歸順王化
永事明庭上對三十三天明神下將宣祇爲證者王曰爾
能恭順我無差徭本州賦租自爲供贍本都兵士亦不抽
差永無金革之虞克保耕桑之業皇天后土山川鬼神吾
之推誠可以元鑒

題名

靜邊都指揮使金紫光祿大夫檢校太保使持節溪州諸
軍事口溪州刺史兼御史大夫上柱國隴西縣開國男食
邑三百戶彭士口武安軍節度左押衙金紫光祿大夫檢
校司徒前溪州諸軍事守溪州刺史兼御史大夫上柱國
彭師佐武安軍節度左押衙前砂井鎮遏使三井都管使

銀青光祿大夫檢校尚書左僕射兼御史大夫上柱國龔
朗芝武安軍節度左押衙銀青光祿大夫檢校尚書左僕
射兼御史大夫上柱國田宏贊武安軍節度衙前兵馬使
前溪州左廂都押衙銀青光祿大夫檢校太子賓客兼御
史大夫上柱國向宗彥武安軍同節度副使攝溪州司馬
銀青光祿大夫檢校左散騎常侍兼御史大夫上柱國覃
彥仙武安軍節度副將充溪州知後官銀青光祿大夫檢
校國子祭酒兼御史大夫上柱國朱彥口武安軍節度左
押衙口江都指揮使知使防遏營金紫光祿大夫天檢校司
徒前溪州諸軍事守溪州刺史兼御史大夫上柱國彭允
珪武安軍節度左押衙金紫光祿大夫檢校司徒前溪州

諸軍事守溪州刺史兼御史大夫上柱國田倬暉武安軍
節度左押衙充溪州副使銀青光祿大夫檢校尚書左僕
射守溪州三亭縣令兼御史大夫上柱國彭師俗武安軍
節度左押衙左義勝第三都都將銀青光祿大夫檢校刑
部尚書前守富州別駕兼御史大夫上柱國彭師杲武安
軍節度同十將前溪州左廂都虞侯銀青光祿大夫檢校
太子賓客兼監察御史上柱國龔貴武安軍同節度副使
前攝大鄉縣令銀青光祿大夫檢校左散騎常侍騎兼御
史大夫上柱國覃彥富武安軍節度左押衙充靜寇都指
揮使金紫光祿大夫檢校司徒前溪州諸軍事守溪州刺
史兼御史大夫上柱國田宏祐武安軍節度左押衙充砂

井鎮遏使銀青光祿大夫檢校尚書左僕射兼御史大夫
上柱國彭師樞武安軍節度左押衙充金澗里指揮使銀
青光祿大夫檢校尚書左僕射兼御史大夫上柱國覃彥
勝武安軍節度討擊副使左歸義第三都都將銀青光祿
大夫檢校左散騎常侍兼御史大夫上柱國彭師口前溪
州大鄉縣令將仕郎試大理評事兼監察御史賜緋魚袋
彭允臻武安軍節度攝押衙充靜寇都副兵馬使銀青光
祿大夫檢校右散騎常侍兼御史大夫上柱國田思道又
有于記文內攢空題名前二人官最顯皆彭氏名已毀其
可見者有知狹州軍州事彭君庸知忠彭州軍州事彭文
綰知南州軍州事彭光明知州彭文儵團鍊彭如遷前三

亭縣令彭如喜三亭縣令彭文雅都監彭文威溪州都監
彭如興溶州都監彭士明統軍使彭如武都揮指使彭文
仙知萬州軍州事田彥存高州巡檢使彭如聰巡檢彭如
品中洞彭如憲統軍彭仕進排軍指揮使陳文綰巡檢朱
繼顯教鍊使屈思靜邊都指揮使彭文勝溪州軍事推官
辛白湘州羅文瞻史軍羅元能巡檢羅萬貴錄事叅軍廖
保詡口南都指揮使羅文彥金唐縣田成蓋教鍊使彭進
溪州知州彭君善鈐轄覃萬福五都彭如亮推誠奉節宏
義功臣天策府都尉武安軍節度副使判內外諸司使永
州團練使光祿大夫檢校大傅使持節永州諸軍事永州
刺史兼御史大夫上柱國扶風縣開國侯食邑一千戶馬

希廣奉敕監臨鑄造五溪巡檢使知向化州彭如會知保
靜州軍州事彭光陵知來化州軍州事彭允會知威化州
軍州事覃文紹團鍊向行仙古州覃萬貴五溪都招安巡
檢使田思備左衛襲貴朋知永州軍州事彭君昌溪洞巡
檢使知武寧州軍州事彭口知富州軍州事覃文勇知謂
州軍州事覃允贊知州朱口通知州符彥貴轄鈴彭如權
鈴轄覃文見知州田彥勝通判田彥強知州田思趙施酉
知州彭允強案馬希廣彭師杲二人並見歐史希廣字德
丕希範同母弟師杲卽士愁子史以愁爲然杲爲暲非也
當依碑爲正十國春秋廢王世家書希廣當文昭王時不
著其官師杲傳官亦畧証之此碑題銜書足補遺又州名

隴州忠彭州南州高州湘州向化州保靜州來化州感化
州古州謂州縣名如金唐官制其職事者大理評事錄事
參軍知軍州事別駕鈐轄團鍊都監巡檢司馬左義勝第
三都都將左歸義第三都都將靜寇都指揮使副兵馬使
靜邊都指揮使節度副將知後官知使防邊營節度衙前
兵馬使節度左押衙溪州左廂都押衙左廂都虞候金澗
里指揮使砂井鎮遏使三井都管使巡檢使排軍指揮使
教練使討擊副使都招安巡檢使統軍使同十將知軍州
諸名地里表百官表概未之收也

後周

衛州刺史郭進屏盜碑

正書杜韓撰孫崇望書
在汲縣顯德二年五月

碑無刊缺予撮其事迹蓋由衛州士庶列狀以聞述去盜
之由稱守臣之美上可其奏命之刊勒乃勅朝請大夫行
右補闕柱國臣杜韓序而銘之郭進見東都事略進仕周
改登州刺史郡多寇盜進悉爲翦除吏民願紀其事命近
臣撰文賜之改刺衛州河朔盜匿汲郡山間者稍聚聞出
攘奪久不能滅進往攻剿絕之民以安居於是郡民又請
立碑紀其事改洺州團練使有善政郡民又請立碑詔左
拾遺鄭起爲文以賜宋史本傳同此碑所云士庶列狀以聞正
與相符又碑云初刺乎坊磁又遷於淄登衛今東都事略
及宋史惟言由登刺衛而前此之爲坊磁淄三州皆不詳
也碑首題大周推誠諡戴功臣金紫光祿大夫檢校司徒

使持節衛州諸軍事衛州刺史兼御史大夫上柱國太原
縣開國男食邑三百戶亦史所未詳碑待鑿仕郎守司農
寺丞孫崇望書字爲行體金石文字記以爲正亦誣

任公屏盜碑

行書顯德三年
閏九月在鉅野

碑前列朝議郎行左拾遺充集賢殿修撰李昉奉勅撰翰
林待詔朝議大夫行司農丞張光振奉勅書末列軍司判
官朝議郎試大理司直兼殿中侍御史張穆篆額金石例
篆額皆與撰書人並此獨居後以前二人奉勅爲之碑載
粵嗣位元年冬十月詔以前趙州刺史任公檢校太保牧
于濟公名漢權蜀國人以武略仕累朝其加號爲推誠奉
義翊戴功臣階爲特進官爲使持節濟州諸軍事行濟州

刺史兼御史大夫勲爲上柱國爵爲西河郡開國公食邑二千三百戶至其功略所著皆未有詳徵惟以屏盜列之豐碑則其時所尙若此可悲也已

中書侍郎景範碑

行書顯德三年十二月在鄆平縣南五里

碑首列翰林學士朝議郎尙書水部員外郎知制誥扈載
撰翰林待詔朝議郎守司農寺丞孫崇望奉勅書文多制
缺案舊五代史景範傳云官爲立碑卽此是也碑載故中
書侍郎平章事景公諱範又載上柱國晉陽縣開國伯及
贈侍中字後載今皇帝嗣位登用舊臣及以列卿歸第懸
車故鄉嗟風樹之忽驚字又載冬十一月薨于淄川郡之
私第

缺下

周太祖紀廣順三年春三月以左司郎中充樞密

直學士景範爲左諫議大夫充職世宗紀顯德元年七月
癸巳以樞密院學士工部侍郎景範爲中書侍郎平章事
碑謂登用舊臣蓋範當太祖時已爲諫議矣碑言晉陽縣
開國伯冊府元龜載世宗卽位七月制詔範爲晉陽縣開
國男當依碑作伯又碑言以列卿歸第案本傳云範理繁
治劇非其所長雖悉心盡瘁終無稱職之譽世宗知之因
其有疾乃罷司計尋以父喪罷相東歸並與碑相符

授堂金石文字續跋卷七終

受業亳州何承寬校

授堂金石文字續跋卷八

偃師武億虛谷著

男穆淳編

孫承重校刊

宋佛項尊勝陀羅尼經幢記

正書乾德元年三月

經幢在亳州城內大寺佛殿之西其東亦有一幢與此對植無年月可見記首題開元寺新修佛項尊勝陀羅尼經幢州志載寺舊名崇因宋改咸平據此記宋初猶名開元則志失於推考矣文爲鄉貢進士黃麟撰其序粵有信士王懷早悟真空志歸元寂罄搜筐篋共圖功德遠市他山口刻斯典又言皇帝口星御極懷斗當陽銅刁罷振連營鉄馬休征遠塞云時乾德元年歲次癸亥三月十八日甲午建會首王環書宋史太祖紀建隆四年十一月甲子

有事南郊大赦改元乾德此幢建于三月巳稱乾德蓋立石時追書之僅下匡字既缺畫而元不爲始祖諱于時立國之初制猶未嚴也顧亭林以宋避太宗御名義士皆改爲信士今此題稱信士王瓌必非豫爲之避義士信士兩名並可通謂之

西陽明洞記

正書乾德五年七月在潯縣

記稱大坯山側有龍窟焉窟之北有石壁每至日昃山半夕陽照明勃勃遍口口皎如洞戶遂易名曰西陽明洞又稱巖壁之由自隋唐已來每有事於水旱嘗下詔宰臣羣官將命祠禱爵里備書如記所志隨唐蓋舊有名題矣又題撰記人庄宅副使霍錢奉宣監護至此宋史職官志皇

城以下諸司使內有庄宅使唐特領此使職率用奄人爲之今此題霍錢其亦內侍品官與自署大宋乾德元年甲子歲建隆四年十一月改元是乾德元年爲癸亥又題乾德五年歲次丁卯甲子既爲改元之歲五年決非丁卯臨文者誤紀歲名而前後不知對勘皆闕流不學之過也

修唐太宗廟碑銘

行書開寶六年十月

碑銘前列朝散大夫行殿中侍御大夫判度支公事柱國李瑩奉勅撰翰林待詔中散大夫行太僕寺丞孫崇望奉勅書李瑩見宋史太祖本紀開寶七年五月殿中侍御史李瑩坐受南唐饋遺責受左贊善大夫亦見李瀆傳云瑩字正白善詞賦廣順進士蒲帥張鐸辟爲記室因家河中

乾德初右補闕蘇德祥薦爲殿中侍御史度支判官使江南坐受李從諫賂遺責授右贊善大夫與碑題銜合崇望見禮志太祖命詞臣分撰嶽瀆祠及歷代帝王碑遣翰林待詔孫崇望等分詣諸廟書於石是太宗廟碑卽歷代帝王碑中之一也碑又載啓舊墓所以極衣冠之飾本紀開寶三年詔西京帝王諸陵寢嘗被發掘者有司備法服常服各一襲具棺槨重塋約紀與碑相符碑前錄帝王陵寢詔曾經開發者重制禮衣常服而碑載旋聞列藩咸訖丕績揚此能事屬千盛朝証之紀文開寶四年夏四月辛卯南唐遣其弟從諫來朝貢發廂軍千人修前代陵寢之在秦者故碑以列藩揚此能事信得其審

重修鑄龍興寺大悲閣像碑

行書端拱二年正月在真定府城

碑前結銜朝奉郎尚書兵部員外郎知制誥柱國賜緋魚袋田錫奉勅撰翰林待詔將士郎口少府監主簿御書院祇候吳郢奉勅書郢見張洎傳翰林待詔尹熙古吳郢皆江東人田錫宋史有傳云轉起居舍人還判登聞鼓院上書請封禪以本官知制誥尋加兵部員外郎與碑題合錫好讀書屬文然文不多見于世予故約此碑之詞云周顯德中世宗納近臣之議詔天下毀銅像鼓鑄以資帑財惟鎮之邦大像亦滅中有字曰遇顯卽毀乾德中乃命重鑄凡四十二臂七十三尺又構以摩雲之閣越太平興國七年僧名瓊法祇受宣召專主是開案五代史周世宗本紀

顯德二年夏五月甲戌大毀佛寺禁民親無侍養而爲僧
尼及私自度者又史贊云世宗卽位之明年廢天下佛寺
三千三百三十六是時中國乏錢乃詔悉毀天下銅佛像
以鑄錢卽此文所記也而王定國隨手雜錄柴世宗銷天
下銅像以爲錢真定像高大不可施工有司請免旣而北
伐命以炮擊之中佛乳竟不能毀未幾世宗癰發乳間而
殂此殆好事者欲誑耀佛氏之靈妄爲是說今以碑証之
明云大像亦滅至乾德中乃重鑄蓋定國亦踵其謬不知
詳驗也

重修北嶽安天王廟碑銘

行書淳化二年
八月在曲陽

碑銘稱法天崇道皇帝宋史真宗紀端拱二年十二月辛

西上法天崇道文武皇帝詔去文武二字餘許之此碑所
題與史合前列承奉郎守左司諫知制誥柱國賜紫金魚
袋王禹偁奉勅撰本傳拜禹偁左司諫知制誥而階承奉
郎勲爲柱國未書也翰林待詔將仕郎守少府監主簿御
書院祇候賜緋魚袋黃仲英奉勅書翰林書直將仕郎守
高州樂原縣主簿御書院祇候葛湍奉勅題額湍見呂文
仲傳寓直御書院與侍書王著更宿時書學葛湍亦直禁
中太宗暇日每從容問文仲以書史著以筆法湍以字學
又見進說文解字序稱翰林書學臣葛湍又見李燾說文
解字五音韻譜本朝雍熙三年錯兄鉉初承詔與句中正
葛湍王惟恭等詳校說文是也後列銜正書字獨小有云

忠果雄勇宣力功臣定武軍節度定州管內觀察處置北
平軍等使金紫光祿大夫檢校太保使持節定州諸軍事
定州刺史兼御史大夫柱國兼駐泊馬步軍都部署清河
郡開國公食邑四千二百戶食實封六百戶張訓職官志
賜號有忠亮忠勇無忠果雄勇攷却掃編中書樞密賜推
忠協謀同德佐理餘官則推誠保德奉義翊戴掌兵則忠
果雄勇宣力外臣則純誠順化張訓卽因掌兵賜號而志
未之及非此則茂由識遺典矣

青山廟新修三門記

行書至
道元年

修三門記鄉貢進士呂應撰學究薛揆書云皇帝以當郡
盤基輔於王室決天波之大派分禁樹之高枝蓋指德恭

判濟州是以云定安公之主郡也銘詞又云潁水先生卽
記稱維那頭陳朗諸人潁川陳氏郡望也後列銜文林郎
守鉅野縣主簿趙嵩將仕郎守大理評事知鉅野縣事朱
澤殿直兵馬監押兼在城巡檢齊汴承奉郎守秘書著作
佐郎通判濟州軍州事借緋穆說皇姪金紫光祿大夫檢
校太保左驍衛大將軍判濟州軍州事兼御史大夫上柱
國定安公食邑一千八百戶趙德恭宋史太宗紀雍熙二
年春正月丙辰以德恭爲左武衛大將軍判濟州封定安
侯右補闕劉蒙叟通判濟州秦王廷美傳載德恭受封在
雍熙元年十二月又以爲封安定郡侯與紀頗不同未知
孰得其實至端拱元年進封安定郡公淳化四年改左驍

衛大將軍與此結銜符其勲階食邑史固從略不書也者
安定之書爲定安碑與紀合似宜依石刻爲正德恭初判濟州劉蒙叟爲
通判至此已受替故至道改元惟穆說蒞任矣又鐫當州
施主前元從押衙陳安唐有元從禁軍元從功臣等號以
此証之太祖陳橋初起亦賜元從之號司馬光傳光曰國
初草創天步尙艱故御極之初必以左右舊人爲腹心耳
目謂之隨龍碑所題元從者正謂是也又哲宗紀紹聖元
年閏四月丁亥詔神宗隨龍人趙世長等遷秩賜賚有差
並可舉証

刻說文偏旁字原

篆書咸平二年六月

說文目錄偏旁爲南岳卧雲安宣義大師賜師夢英書後

附刻其自序其文過自矜詡以爲惟汾陽郭忠恕共余繼
李監之美宋史列傳忠恕河南洛陽人此云汾陽當舉其
祖望也又附忠恕答書云見寄偏旁五百三十九字按說
文字原唯有五百四十部子字合收在子部今目錄妄有
更改之又集解中誤去部在注中今點檢偏旁少晶蕊至
龜弦五字故知林氏虛誕誤於後進是則宋初之本訛脫
見摘於郭氏如此攷林氏謂林罕也江少虞皇朝事實類
苑與宋景文筆記並載錯爲說文繫傳恕先作汗簡佩觿
時蜀有林氏作小說然狹於徐郭者當卽其人後又題推
忠宣力翊戴功臣建武軍節度觀察留後知永興軍府事
兼都提轄永興軍華耀乾商兵甲捉賊公事光祿大夫檢

校太傅上柱國彭城郡開國公食邑四千五百戶食實封
七百戶劉知信推誠宣力翊戴功臣鎮寧軍節度瀘州管
內觀察處置河堤等使金紫光祿大夫檢校太傅使持節
瀘州諸軍事行瀘州刺史兼御史大夫知涇州軍州事兼
管界都巡檢使上柱國平陽郡開國公食邑四千二百戶
食實封一千戶柴禹錫史本傳禹錫至道初制受鎮寧軍
節度知涇州與此合知信咸平初拜建武軍節度度觀察
留後知永平軍府永平卽永興字轉訛也

高紳等題名

右題名正書文云右司諫直史館知華州高紳尙書戶部
員外郎直史館曾致堯陝西轉運副使太常博士李易威

平四年閏十二月十五日記宋史列傳張齊賢爲涇原鄜

寧環慶等州經略使選致堯爲判官

却掃編同朝咸平中張文定公齊賢奏請

戶部員外郎直史館曾致堯爲判官

仍遷戶部員外郎其直史館猶帶於此

也又東都事略載致堯爲尙書戶部員外郎直史館與題

名合元豐類稿先大夫集後序云始公尤見奇于太宗自

光祿寺丞越州監酒稅召見以爲直史館遂爲兩浙轉運

使未久而真宗卽位益以材見知初試以知制誥及西兵

起又以爲自陝以西經略判官然則致堯當咸平時已知

制誥而題名結銜猶用其直史館當以其初試未真爲之

也易見河渠志開寶八年知瓊州李易上言州南五里有

度靈塘開修渠堰溉水田三百餘頃居民賴之卽其人

修文宣王廟記

八分書咸平口年
八月在臨潼縣

碑記將仕郎守京兆府臨潼縣主簿王漢撰鄉貢進士蕭
資書并題額文多漫漶中有云咸平紀號之元年詔以太
子中令趙公蒞是邑明年春拜孔子廟返則召邑中進士
明經之好事者又募邑中人之有識者鳩材撤舊而新之
其略如此後列銜各多磨滅錄其顯存者口仕郎守殿中
丞通判軍府事騎都尉借緋劉克勤正奉大夫尙書兵部
侍郎知軍府事上柱國賜紫金魚袋天水縣開國伯食邑
九百戶趙昌言宋史本傳昌言真宗卽位遷兵部侍郎知
陝州表求還京不許未幾移知永興軍此題知軍府事卽
永興軍府以當任在本路故結銜不更書永興也昌言爵

爲開國伯史失書

錢惟演北岳題名

右題名八分書自左起文云景德二年夏京師霖潦詔太僕少卿直秘閣錢惟演止雨于安天王祠時七月六日侍禁劉承澤同行宋史列傳惟演召試學士院以笏起草立就真宗稱善改太僕少卿獻咸平聖政錄命直秘閣與題名合惟景德二年夏京師霖潦致勞遣使致禱而淫雨之災真宗本紀及五行志並佚脫不書豈以在都下史筆有所諱言之與惟演奉使傳亦未載皆失紀也

賀遵式北嶽題名

右題名正書文云維大宋景德二年歲次乙巳十一月乙

已朔三十日甲戌內殿崇班鎮定邢趙等州沿山東山西
都巡檢使銀青光祿大夫檢校左散騎尙侍兼御史大夫
騎都尉清水縣開國子食邑五百戶賀遵式部領軍馬巡
檢至此遂齋心詣廟口獻香紙以表虔誠也宋史職官志
巡檢司或數州數縣管界此題鎮定邢趙數州之制也又
掌訓治甲兵巡邏州邑此題部領軍馬巡檢至此與史符
合常侍作尙侍尙有常音因以音字爲正字上石者不能
無謬誤矣遵式爲內殿崇班初授檢校當爲國子祭酒兼
御史大夫今作左散騎常侍蓋遇恩例累加也

李允正北岳題名

右題名正書文云客省使誠州刺史鎮定等州兵馬都鈐

韓知定州軍州事兼管內制置營田勸農等使李允正景德三年丙午十月己亥八日丁丑奉詔致祭宣德郎太常博士通判軍州兼制置營田事輕車都尉借緋王利內殿崇班閤門祇候兵馬都監魏化基預三獻之禮陪位三班借職隨行指使張儀候口將仕郎守曲陽縣令董日靖按允正宋史有傳云字修已與錢若水同詣洪德懷安沿邊諸砦經度邊事加領誠州刺史改客省使知定州兼鎮定都鈐轄與題名結銜合

龐奎題名

右題名行書文云景德三年冬口天王降靈寶三錄壇口式于四嶽勅屬郡口更營築于廟殿之前自十月孟旬承

郡匠旋至十一月五日畢因刊闕石以紀歲事之口將仕
郎試芸口吏守主簿龐奎題靈寶三錄于史無所攷然崇
信之篤命官爲營築亦其崇飾天書之意兆諸此矣試芸
下當作閣字以秘書省有秘閣得置吏也陳述古題名內
載芸校卽謂秘書省校書郎與此正同

永興軍修元聖文宣王廟大門記

有書大中祥符二年
六月在西安府學

碑前列朝奉郎尙書比部員外郎知制誥知軍府兼口內
勸農使上輕軍都尉賜紫金魚袋孫僅撰朝奉郎尙書屯
田員外郎通判軍府兼管內勸農渠河事上騎都尉賜緋
魚袋冉宗閔書僅宋史有傳景德初北邊請盟遣使交聘
僅首爲國母生辰使遷右正言知制誥賜金紫是年冬永

與孫全照求代真宗思擇循良任之御書邊肅泊僅二名
示宰相或言僅嘗倖京府詣民政乃命知永興軍府結銜
並與史同但碑稱丁未歲冬奉命出守丁未爲景德四年
而傳卽書是年冬于景德初之後攷真宗紀遣太子中允
孫僅使契丹實景德二年二月及後又遷官必非在此一
年出守永興以碑作四年証之疑史文稱是年是卽四字
之訛僅兼管內勸農使宗閔兼管內勸農事入銜宋朝事
實景德二年從丁謂所請少卿監刺史閤門使以上知州
者並兼管內勸農使餘及同判並兼勸農事是也碑之立
在大中祥符二年六月禮志云是年五月乙卯詔追封十
哲爲公七十二弟子爲侯先儒爲伯

云 旣以國諱改謚

至聖文宣王此碑猶稱元聖改諡之詔時尙未及永興與建廣武原宣聖家廟碑記

正書大中祥符二年十月在河陰縣

碑載祥符元年駕幸曲阜釋奠廟林賜孔氏男女錢帛有差四十五世孫孔延世襲封文宣公宋史真宗紀至道三年未改元九月戊寅以孔子四十五世孫延世襲封文宣公孔宜傳延世字茂先以父死事賜學究出身爲曲阜主簿歷闕長葛二令真宗至道三年十一月召赴闕以爲曲阜令襲封文宣公碑又云奏孔氏有隨駕叅軍孔晃一枝在河南廣武原上召問晃具陳臣祖孔幾仕唐禮部尙書國公孔緯皆荷先朝御塋廣武原子孫守墳不能東歸上喜更命留守王羽騰來原建修家廟始于祥符二年仲春

落子孟冬之月眞宗紀大中祥符元年十一月戊午幸曲阜縣謁文宣王廟遂幸孔林禮志詔以十一月一日幸曲阜備禮謁文宣王廟內外設黃麾仗孔氏宗屬並陪位復幸孔林以樹擁道降輿乘馬至文宣墓設奠再拜碑稱釋奠廟林與史合但以其先臣弒與緯仕唐蒙御塋新舊唐史俱不載又韓文公孔弒墓誌銘亦言公子塋公于河南河陰縣廣武原先公僕射墓之右亦無所稱御塋者或其家乘炫飾之詞不足信也又孔晃一支經延世具陳在河南廣武原始末存著石刻昭信如是今關里文獻攷于宗支流寓不附其名殆失搜錄碑後列贊詞題爲御贊禮志親製刻石廟中當卽是文

周瑩北岳題名

右題名正書文云推誠保節宣力翊戴功臣天平軍節度
鄆州管內觀察處置等使金紫光祿大夫檢校太傅使持
節鄆州諸軍使鄆州刺史口鎮定路駐泊馬步軍都部署
兼知定州軍州管內制置營田勸農使兼御史大夫上柱
國汝陽郡開國公食邑七千一百戶食實封二千六百戶
周瑩大中祥符三年九月二十三日後又有結銜與此題
同惟六百戶作八百又書氏而不名差異耳宋史列傳周
瑩大中祥符初改太平軍節度明年爲鎮定都部署兼知
定州與此題合而賜號及官階勲爵悉畧而不書又改大
平軍節度以題名攷之當爲天平軍也天平軍節度本鄆

州題稱鄆州刺史爲得其實職官志功臣賜號有宣德無
宣力今按之此題宣力翊戴知史有誤焉已

汧陽縣普濟禪院碑銘

大中祥符三年十一月

碑銘首題宣德郎尙書都官員外郎知隴州軍州兼管內
勸農事上騎都尉賜緋魚帶借紫閭仲卿撰京兆府廣慈
禪院文學沙門善雋習晉右將軍王羲之書文序普濟禪
院自唐武德中創建歷開平同光各有興葺洎開寶元年
賜紫僧進詞重疊興替益爲增治于太平興國三年降勅
改爲普濟禪院事跡始末尙可概見後列諸官名氏其稱
內品宣德郎守內侍省內寺伯武騎尉監酒稅梁延意攷
宋史職官志內侍省無內寺伯之名惟唐志有之疑官豎

不通古今謬以唐制假號爾善雋自署習王羲之書與濟源延慶禪院舍利塔記楊虛已所題同當由一時習尙爲之不足異也

龍門銘 正書

龍門銘真宗御製御書并篆額少有斷剝已失御製二字前爲序有云躬薦兩圭祀汾陰而祈民福言旋六轡臨維宅而觀土風後乃書銘最後題大中祥符四年三月十日玉海祥符四年祀汾陰回三月癸未幸西京龍門山諸寺作遊龍門詩又作龍門銘卽此是也宋史真宗紀是年三月己卯次西京至甲午發西京中間駐驛凡十六日登覽臨幸固宜有是銘然紀于二月祀后土書作汾陰配饗銘

河濱四海贊今此銘不書紀蓋從略之

元聖文宣王贊加號詔

正書大中祥符五年八月在孟縣

元聖文宣王贊宋真宗御製先爲序後乃書贊僅缺數字

序云檢玉介邱迴輿闕里宋史禮志大中祥符元年封泰

山詔以十一月一日幸曲阜卽指其事加號詔文已殘缺

不可屬讀後另行書詔先聖加號元聖文宣王

缺

部尙書

口齊賢等以太牢致祭字存齊賢卽張齊賢本傳景德初

起爲兵部尙書二年改吏部尙書從東封還復拜右僕射

以記按之齊賢被命致祭卽在東封時矣志載親製贊刻

石廟中謂此贊也

案元年已親製贊刻石廟中二年又親製元聖文宣王贊元聖卽此詔所云加

號也而志不言刻石又此碑立在五年尙從元聖之諡不以至聖爲詞

當時惟見于曲阜文

宣王廟及按此石後記五年八月二十三日奉勅道州府軍監各於下則諸處皆得立石而史文爲失紀也石在孟縣學署前余癸丑冬十一月重過此復就碑諦視爲手撫者久之

楊永貴北嶽題名

右題名正書文云大中祥符五年十月二十四日聖祖九天司命天尊大帝降延恩殿宣差入內內侍內侍高品楊永貴於安天元聖帝廟并真君觀請道士二七人僧二七人起建道場各三晝夜於閏十月十七日開啓至二十三日罷散故記之真宗紀五年冬十月戊午延恩殿道場帝瞻九天司命天尊降采朝事實聖祖以大中祥符五年十

月戊午降于禁中延恩殿云閏十月癸巳恭上九天司
命保生天尊號曰聖祖上靈高道九天司命保生天尊大
帝較史文爲詳証之此題則于司命下多保生字案閏十
月乙丑朔癸巳乃二十九日永貴以此月十七日開啓至
二十三日罷散上號之詔猶未聞故于保生二字題名時
不備

康廷讓北嶽題名

右題名行書文云大宋大中祥符六年二月十九日奉勅
移塑安天元聖帝尊像先於真君觀請道士二十七人起建
道場七晝夜罷散至二十二日夜質明用三獻官并祭禮
祭告安天元聖帝訖至二十五日卯後四刻用乙時移安

天元聖帝于後殿興靖明后相並安置訖當日亥時請道士二七人起建安神道場七晝夜罷散日各設醮一座謹具三獻官并陪位官如後初獻官入內內侍省內侍殿頭勾當北岳移塑康廷讓亞獻官東頭供奉官知曲陽縣兼兵馬監押褚省恕終獻官定武軍節度推官承奉郎試大理評事苗用之陪位官三班差使殿侍權鎮定等州沿西山同巡檢張恩將仕郎守曲陽縣主簿陳化新將仕郎守曲陽縣尉賈化昌翰林圖畫院學生郎坦龐德震管押衮冕定州部署司指使三班奉職韓裔定武軍都知兵馬使都大部領一行移塑李士元移塑司定州使院勾押官蓋昇前行牛旻魏澄王恩後行李德教鍊使勾當設務趙翰

衙前軍將王準耿澄案朱史真宗本紀及禮志皆未載穆
塑與靖明后並置之文或以其事微不與加號奉冊比也
職官志翰林院勾當官一員以內侍押班都知充總天文
書藝圖畫醫官四局凡執技以事上者皆在焉然則此稱
翰林圖畫院當與志合而學生名或卽當時執技者也若
志言翰林醫官有學生常以春秋合格者取三百人據是
則圖畫亦宜有學生矣

呂言同北嶽題名

右題名正書文云大中祥符六年五月七日勅以玉清昭
應宮聖像到京命尙書都官員外郎呂言同殿中丞通判
定州軍州事王臻祭告北嶽安天元聖帝是月二十三日

行禮畢同行禮東頭供奉官知曲陽縣事兼兵馬監押稽
省恕讀祝文將仕郎守曲陽縣主簿陳化新真宗紀六年
三月乙卯建安軍鑄玉皇聖祖太祖太宗尊像成以丁謂
爲迎奉使五月甲辰聖像至今題名所記聖像到京是其
事也紀又言乙卯謁聖像奉安于玉清宮丁巳遣使奉告
諸陵然則當時張皇其事既已告諸陵寢矣而方獄之告
竟不著焉失於詳紀矣

空桑廟碑贊

篆書大中祥符七年正月

碑在杞縣中刊斷文句頗不屬首行題宋真宗幸空桑觀
闕御製碑下缺後題大中祥符七年春正月二十九口口
口闕奉勅撰勒刻石宋史真宗紀是年春正月壬寅車駕

奉天書發京師蓋因六年八月有詔來春親謁亳州太清宮至此途次所經得以臨幸空桑廟也碑云朕因駐口口用懷賢聊復刻銘庶幾旌善與紀可相證惜史以其事微不書也

真宗御製先天太后贊

正書大中祥符七年在鹿邑

先天太后贊前有序略云大明聖善之德別建密清之庭奉先天之名所以崇徽傳葺洞霄之宮所以法元都云云玉海祥符七年七月御製朝謁太清宮頌西京頌明道宮碑聖祖殿等銘贊卽此碑是也宋史真宗紀大中祥符七年正月己酉朝謁太清宮是夜月重輪幸先天觀廣靈洞霄宮碑所云先天洞霄者當指其迹水經注潯水內李母

冢冢東有碑是永興元年譙令長沙王阜所立碑云老子

生於曲澗

新唐書地理志真源縣有洞霄宮先天太后祠

蓋李母靈魄託此已

久宜爲後世崇飾所起也紀於六年七月書亳州官吏

老

三千三百人詣闕請謁太清宮今碑序眷惟景毫之耆舊

口象魏之縉紳述款謁之令儀舉省方之舊典與紀文相

符碑質過大摸拓殊不易余及門何栗亭自其外姻家轉

假一紙俾余跋之

嚴國禎題名

右題名正書文云皇宋甲寅歲尙書都官員外郎嚴國禎

奉命祭告上玉皇大天帝聖號及含譽星見東頭供奉官

知曲陽縣事兼兵馬監押諸省恕將仕郎守曲陽縣主簿

陳化新同預獻官將仕郎守曲陽縣尉寶化昌讀文定州
指使桑美陪位時大中祥符七年十月八日記宋史真宗
本紀大中祥符七年九月丙戌含譽星再見辛卯尊上玉
皇聖號曰太上開天執符御歷含真體道玉皇大天帝証
之今題名所記蓋當時遣使祭告方嶽爲失紀矣禮志於
七年九月下書詔以來年正月上玉帝聖號今此題書上
聖號卽在七年與紀合或當時先立號告方嶽至八年乃
真宗親上故志與紀有異

高繼勳北嶽題名

右題名正書文云甲寅直歲國家以立冬致祭詔郡縣長
吏躬行祀事因得率僚佐充三獻官伏謁于祠下初獻官

西上閤門副使榮州刺史知定州軍州事兼管內營田制
置勸農使充鎮定等路駐泊兵馬鈐轄高繼勲亞獻官太
常博士通判定州軍州兼制置營田管內勸農事騎都尉
王閏終獻官贊善大夫監定州商稅務上騎都尉崔應機
守縣尉牛口口守主簿夏侯裔左侍禁知縣事何仁儼後
又有高繼勲題名書銜同此但不著年月又不列三獻官
名按甲寅直歲大中祥符七年也書甲子而不書年號當
以碑陰上題名甲寅已紀號爾繼勲附父高瓊傳載奉使
契丹還知定州遷西上閤門使昭州團練使徙郾延路鈐
轄坐市馬虧失官已而復爲西上閤門使榮州刺史知興
州領果州團練使徙貝州復知瀛州據此題爲榮州刺史

後又復知定州傳竟失錄爲西上閤門副使而傳稱閤門使皆史之失也

陳堯佐請平治太行山道劄子

大中祥符八年十二月

劄子石刻陳堯佐爲河東轉運使患太行山險公私綱運人畜費力乞降勅命下懷澤兩州每於四處巡察一度舉行差官相度如有雨水衝泛妨滯車牛之處卽計工量差上口塘馬勒員催部押修填開築平作了畢卽畫時押送爲使并不差擾修增況本處嘗有山路巡檢使臣便令提轄點校甚不費力頗利公私以史証之堯佐自徙京西轉運使又徙河東路劄子卽上於此時然傳載堯佐奏除石炭稅及減澤州大廣冶鉄課數十萬而鑄治隘道區畫之

善反不特書此於堯佐幹略沒其實矣歐陽集文惠陳公
神道碑銘載其在河東鑿澤州路後徙河北鑿懷州路而
大行之險通行者德公以爲利卽此劄子所上是也山路
巡檢使職官志亦失載

北嶽安天元聖帝碑銘

行書大中祥符九年四月在曲陽

碑首序真宗詔北嶽安天王可增號安天元聖帝上被華
袞兼鎮圭步自青蒲臨於黻座出板詔命輶軒以尙書工
部侍郎馮起攝太尉太僕少卿攝司徒裴莊奉玉冊袞冕
於曲陽之祠又云恭冊將陞於文陛卽爲之興瑞節已出
於端闈然後乃罷宋史禮志稱帝改服袞冕御乾元殿中
書侍郎引五嶽玉冊尙衣奉袞冕升殿上爲之興玉冊發

至于朝元門外帝乃坐今以碑按之所紀當時儀注與史並符馮起裴莊二人奉冊蓋一爲使一爲副莊本傳云爲北撤加號冊禮副使是也而眞宗紀但書向敏中等爲五嶽奉冊使餘人不悉記文從畧耳又陳彭年奉勅所撰結銜翰林學士太中大夫行給事中知制誥兼龍圖閣學士秘書監同修國史集賢殿修撰知禮儀院上柱國招信縣開國子食邑六百戶賜紫金魚袋與本傳符惟太中大夫知制誥及爵爲開國子失載後結銜正書字微小東染院使銀青光祿大夫檢校工部尙書知定州軍州兼制置營田管內勸農事充鎮定等路駐泊兵馬鈐轄兼御史大夫騎都尉彭城郡開國侯食邑一千五百戶劉承宗史本傳

載拜東染院使知定州又兼鎮定路兵馬鈐轄而階勳爵
及檢校兼官悉未之及也

王懷珪題名

右題名正書自左起文云大中祥符九年六月十二日入
內內侍省內侍高品王懷珪奉宣于嶽廟真君觀道場七
晝夜罷散日設醮一座續勅差太府少卿蔡汝賁缺祝版
祭告同會於祠大理寺丞知縣事張綽書長安普濟廣教
大師澄遠宋史職官志有內侍省入內內侍省而入內內
侍省尤爲親近故懷珪奉宣嶽廟自爲題名加手朝臣之
上足以知其恣而橫也懷珪附宦者王繼恩傳子懷珪轉
入內高班

王能北嶽題名

右題名正書文云侍衛親軍馬軍副都指揮指揮使振武
軍節度勝州管內觀察處置等使金紫光祿大夫檢校太
傅使持節勝州諸軍事勝州刺史鎮定等路駐泊馬步軍
都部署知定州軍州管內制置營田勸農使兼御史大夫
上柱國瑯琊郡開國公食邑二千七百戶食實封四百戶
臣王能亞獻官朝奉郎守殿中丞通判定州軍州兼管內
營田勸農事借緋臣王臻終獻官觀察支使宣德郎試大
理評事兼監察御史臣林茂先後複題王能官銜無年月
宋史列傳王能大中祥符二年詔合鎮定兩路部署爲一
命能領之明年召入拜侍衛步軍副都指揮使領曹州觀

察使祀汾陰留爲京城巡檢兼留司殿前司事禮成加領
振武軍節度復爲鎮定都副部署兼知定州此題旣題振武
軍節度則在祀汾陰禮成後復爲鎮定時也然傳唯稱副
都部署題名稱都部署或初爲副而漸轉爲都史不及收
也又傳稱步軍都副指揮使題名作馬軍當依題名爲正王
臻傳舉進士中第爲大理評事歷知舒城會昌縣通判徐
定二州今題名稱通判定州是也不載初獻官與曹瑑題
名同亞獻終獻稱臣某又與曹瑑異

授堂金石文字續跋卷九

偃師武億虛谷著

男穆淳編

孫耒重校刊

宋章安世北岳題名

右題名正書文云大宋天禧元年歲次丁巳正月一日辛丑皇帝詣玉清昭應宮恭上玉皇寶冊袞服及詣景靈宮上聖祖寶冊仙衣至十一日辛亥朝饗太廟南郊恭謝禮畢奉聖旨差朝奉郎行太常博士章安世祭告北嶽聖祠終獻官定州觀察支使宣德郎試大理評事兼監察御史茂先亞獻官左班殿直知曲陽縣事兼兵馬監押沿邊山口寨鋪巡檢張禹吉初獻官朝奉郎行太常博士輓車都尉章安世宋史真宗紀天禧元年春正月辛丑朔改元詣

玉清昭應宮薦獻上玉皇大天帝寶冊袞服壬寅上聖祖
寶冊已酉上太廟謚冊庚戌享六室辛亥謝天地于南郊
與此題合夢溪筆談上親郊廟冊文皆曰恭薦歲事先景
靈宮謂之朝獻次太廟謂之朝饗末乃有事于南郊今所序
亦先景靈宮末乃及太廟南郊蓋掌故所存有由然也

內侍殿頭鄧保口題名

右題名行書首尾不完其文云京官勾部送御製書奉神
述碑石壹疋赴西嶽廟殿上西畔於天禧四年口月二十
七日已後午前丙時豎立訖故記之入內內侍省內侍殿
頭鄧保口宋史禮志加上五嶽帝號帝自作奉神述備紀
崇奉意碑撰冊文真宗紀大中祥符四年五月乙未上五

嶽帝號作奉神述玉海祥符四年七月丁亥資政殿大學士向敏中等請以聖制奉神述刻石遂親書刻石於奉神觀九年三月庚申丁謂請刻石於會靈觀從之與此題合至建堅碑石已越九年則史未具錄也鄧保下缺字疑當爲吉字范鎮傳副都知任守忠鄧保吉同日除者當是其人也

摩騰入漢靈異記

行書天禧五年正月

記爲西蜀武都山僧景遵書在今洛陽白馬寺不見撰人名氏蓋唐長興三年二月所記宋時爲重建之者約其文云己巳之歲四月八日孝明皇帝駕幸鴻臚卿寺詔問迦葉摩騰述聖塚所由帝遂爲造浮圖至後周二年四月八

日塔上現異云石林燕語漢以來九卿官府皆名曰寺鴻臚其一也本以待四裔賓客明帝時攝摩騰竺法蘭自西域以白馬負經至舍於鴻臚寺既死屍不壞留寺中後遂以爲浮圖之居卽雒中白馬寺也然則摩騰固嘗寄魄于此宜其幻迹多矣鴻臚書作廬湧起書作勇上石者誤

段微明題名

右題名正書自左向右文云乾興元年二月十五日奉宣差入內內侍省內侍高品段微明往慶成軍太寧宮太寧廟各開啓道場缺七晝夜罷散日缺趨西嶽廟并真君觀各開啓道場缺夜各設清醮一座宋史禮志祈報諸祭云或啓建道場於諸寺觀或遣內臣分詣州郡如河中之后土

廟太寧宮亳之太清明道宮兗之會真景靈宮太極觀鳳
翔之太平宮舒州之靈仙觀江州之太平觀泗州之延祥
觀皆函香奉祝驛往禱之題名段微明奉差往虜成軍即
遣內臣分詣也微明所未著其實以真宗本紀案之乾
興元年二月甲寅對宰相于便殿帝不豫增劇禱于山川
神祇是月庚子朔甲寅爲月之十五日微明此行當爲真
宗祈佑與

留題安天元聖帝廟詩并序

詩序正書朝奉郎守太子中舍同判成德軍府兼管內勸
農事騎都尉賜緋魚袋趙惟吉上序云北岳安天元聖帝
廟巨宋端拱二年中先父察院奉太宗皇帝睿旨與張殿

頭監重修而厥功告成至淳化二載賜碑以旌其事王內翰之文黃御書之字惟吉于天聖元祀仲秋月奉轉運使差提入便軍儲由中山之曲陽詣是廟伸朝拜之禮閱是碑興感慕之懷輒敢鐫巴什于碑陰詩未具錄案同判成德軍不云通判攷齊東野語本朝章獻太后父諱通嘗改通直郎爲同直郎通州爲崇州通判爲同判通進司爲承進司通奉爲中奉通事舍人爲宣事舍人至明道間遂復舊此題當天聖元祀故宜以同判相避易與宋史仁宗紀初卽位詔中外避皇太后父諱正合

賜賀蘭栖真勅并贈詩序碑

楊虛已行書天聖九年十月在濟源

碑上方列真宗勅書及二韻詩宋史賀蘭栖真傳亦載勅

書以此參校傳凡稱師碑皆作汝脫屣浮雲之外碑作浮
榮爰命使車碑作使臣往申禮聘碑作以禮徵聘來儀闕
廷碑作來至必副招延無憚登涉碑作無辭跋涉之勞當
體招延之意又今造入內內品李懷贊召師赴闕碑于入
內下多高班字李懷贊多往彼字案懷贊見李神福傳子
懷贊卽其中方列七言四韻詩一首贈宗真大師下題
尙書右僕射判軍州事張齊賢上又七言詩一絕贈賀蘭
宗真大師下題知制誥陳堯咨上傳載栖真號宗元大師
碑作宗真由避國諱也然真宗賜詩稱玄元留教五千言
豈至尊固可以臨文不諱耶下方載進士汪仲詢所撰序
其文云賀蘭栖真者譙國人也始事驪山白鹿觀馮洞元

口仲寂復訪道於終南結茅於巖曲後更思得福地以毓
其真於是乎游王屋口濟源濟之奉仙卽唐小魯真人舊
隱之所今本傳不悉其里居所在但云不知何許人及栖
真生平寄隱並在陝西傳惟書始居嵩山紫虛觀而已碑
載二年秋九月遣中侍馳蒲輪賁鸛板而召之入對崇和
果加前席未幾請還後于錫符紀號之三祀冬十一月二
十有一日無疾而終享年一百一十三歲傳唯稱爲道士
自言百歲皆不如碑之詳也碑又載卒後魄體柔軟與傳
稱卒時大雪經三日頂猶熱文亦小異

張旻留題詩石刻

天聖三年十月張得一書

張旻改名耆宋史有傳今按此題首序云余自天禧元祀

解宥密之職首治是邦越期月而移蒞他郡于今八載復
領蕃政再踐殊館仰廟貌之如昔感威靈而長在強抽鄙
思以紀歲華後列五言詩一章並行書其餘則正書旻本
傳進宣徽南院使罷判河陽所謂首治是邦也傳又云丁
父母憂起復徙武寧軍節度使卽此移蒞他郡也序又稱
復領藩政宰輔表天聖三年十二月乙丑張旻自淮南節
度使檢校太師同平章事依前官遷樞密使下又有歷河
陽之文悉與石刻合然旻題銜淮南節度使特進檢校太
師同中書門下平章事判軍州事蓋當三年十月七日已
立石矣則被命更前於十月而表反書於是年十二月乙
丑所未悉也後列旻諸子從一禮一得一如一昭一街名

傳稱旻有子二十四人得一可一利一希一誠一今得此
題又附見其四矣得一題東頭供奉官閤門祇候傳言得
一慶歷中守貝州妖人王則作亂不能死又與之草禮儀
伏誅是也旻御諸子嚴肅有法日一見之卽出就外舍而
得一可一尙不免刑誅況淫酗以率其子者能幸脫與

西京龍門山大像龕題名

右題名正書自左起文云三班借職監伊河竹木務兼本
鎮煙火修整石佛像石道公事口口弟祐同至并仲子觀
東鄉友口吏顏翰安定胡汎同至此大宋天聖四年丙寅
三月二十九日口書鑄手李口竹木務于職官志屬將作
監至西京設此官程伯淳傳求監洛河竹木務司馬光傳

光居洛河南尹轉運使敬事蔡夫申獨爲設一班光顧吏引天申立監竹木務官富贊善之下据此題則伊河已設務矣又云兼本鎮煙火職官志鎮砦官諸鎮置于管下人煙繁盛處設監官管火禁文獻通考建隆三年置鎮將只許勾當鎮下煙火爭競公事宋二陵採石碑後題亦有朝奉郎監西京偃師緱氏鎮管勾城內煙火事兼稅場驍騎尉賜緋魚袋孫龐名蓋每鎮皆設此員史不及悉錄也至南渡後逐路置兵馬都監兵馬監押掌烟火公事捉捕盜賊蓋沿于此本鎮卽龍門元豐九域志建春門彭婆洛陽龍門上東門五鎮此其一也

濟源令陳公善政錄

正書天聖九年四月在濟源

碑首列將仕郎試秘書省校書郎前安利軍判官張庚撰
進士楊虛已書安利軍卽地里志通利軍天聖元年改碑
云潁川陳公謂省華也省華見堯佐傳事孟祖爲西水尉
蜀平授隴城主簿累遷櫟陽令徙樓煩令此碑稱孟蜀納
籍載謂得此縣是也是潁北陳君知和墓誌銘孟祖以蜀
歸曾祖諱省華始來自蜀爲祥符人
仕本朝爲左碑載省華聞太夫人憂亟解印州民結狀以
諫議大夫留上敷詔賜允號讓不獲視事如舊宋重守令曲遂民望
爲之奪情如此又載受詔歸闕人懷舊惠蓋指省華在濟
源已內召而史惟稱徙樓煩令復召爲太子中允攷之未
審也後又載省華秩爲諫大夫而史稱拜左諫議大夫又
以諸子貴贈官至尙書令史贈太子少師皆宜以碑爲據

後列將仕郎縣尉王宏將仕郎守主簿王克昌左班殿直
知縣事兼兵馬監押裴德滋三人名左班殿直由武階知
縣事按之職官志惟建炎多差武臣此當天聖間已以武
階爲之矣

勸慎刑文并序

正書天聖口年
在西安府學

序文正議大夫守禮部尙書充集賢院學判西京留司御
史臺柱國南安郡開國公食邑四千三百戶食

實封

六百戶

賜紫金魚袋晁迥述宋史列傳迥請分司西京特拜工部
尙書集賢院學士判西京留司御史臺仁宗卽位遷禮部
尙書証之此題但于爵南安郡開國公失載其食邑及實
封之數參差不符史所謂加例而無定法者職此故也傳

稱迴遷殿中丞坐失入囚死罪奪二官是以暮年著此文而約舉正經正史期于深識之士三復盡心則豈非髦而能舉其過者與後又召對延和殿復獻斧辰慎刑箴大順審刑無盡燈頌凡五篇當與此文相證明惜佚未盡傳隨手雜錄晁文元迴嘗言歷官臨事未嘗挾情害人危人售進保全固護如免髮膚之傷由此文觀之迥爲人信可風矣

范雍題名

右題名一正書自左起文云陝西轉運使尙書兵部員外郎賜紫金魚袋范雍乾興壬戌歲四月七日又題名一正書自右起文云去年題名在缺今歲自三司度支副使遷

此官復爲本路轉運使再謁鹽祠天聖癸亥九月十四日
按前題名所記乾興真宗改號是年二月仁宗嗣位猶未
改元故稱乾興也宋史本傳雍歷河北陝西轉運使入爲
三司戶部副使又徙度支以尙書工部郎中爲龍圖閣待
制陝西都轉運使然當乾興已爲尙書兵部員外郎史竟
失載又爲陝西都轉運使職官志載諸路事體當合一則
置都轉運使以總之又云都運廢置不常而正使不廢雍
旣前稱陝西轉運使後又云復爲本路轉運使蓋本路與
兼諸路有異而史乃以爲都轉運使記載之舛賴石刻正
之類如是也又案志稱三司使內鹽鐵度支戶部各副使
以員外郎以上歷三路轉運及六路發運使充雍前題陝

西轉運使尙書兵部員外郎充此官是也雍本傳始入爲三司戶部副使後遷度支故題名稱度支而東都事畧脫度支不書失其官敘矣

留題延慶寺詩

正書在濟源

延慶寺留題詩范雍伯純二章陳堯佐希元和詩三章初書于碑未知何時摹勒上石首題尙書戶部侍郎知河陽范不書名當是希元命其子書牌故爲缺之伯純記延慶精舍故潁川密相以昔先中令曾製錦是邑與叅預貳卿及天雄故帥俱肄業于寺天禧中密相謝病乞理此邦真廟美其若畫錦而歸御製贈行詩傳在屋壁按密相堯佐兄堯叟也宋史列傳堯叟素有足疾屢請告九年夏帝臨

問勞賜加等疾甚表求避位遣閭門使楊崇勳至第撫尉
以詢其意堯叟詞志頗確拜右僕射知河陽肩輿入辭至
便坐許三子扶掖升殿賜詩爲餞今序題所謂御製贈行
詩蓋指其事但堯叟出知河陽由于陳乞欲得便地則傳
未嘗具錄也序稱天禧中密相謝病傳以爲在大中祥符
九年宰輔表亦書九年八月丙戌樞密使陳堯叟辭疾以
尙書右僕射免陳述古題名序其家世云祥符九年孟父
中令公引罷樞府相國出判三城與史同此題作天禧中
未知孰得其審堯佐和詩內註先中令昔典是邑兄長相
公季弟太尉洎子皆肄業茲寺述古題名亦云太平興國
六年先祖太師中令素園
公宰邑茲土時孟父中令大人太尉按傳載堯佐父省華
相公季父太尉康肅公並肄業精舍

事孟昶爲西水尉蜀平授隴城主簿累遷樂陽令徙樓煩
令以此題攷之固已爲濟源令矣堯佐兄弟從父宦遊肆
業於茲其遺跡向有題名壁龕而傳唯載堯佐初肄業綿
山後從种放於終南山豈非不及詳采之過與又雍出知
河陽堯佐出知永興軍府俱當明道二年太后崩後執政
多罷免雍本傳罷爲戶部侍郎知陝州改永興軍以疾請
近郡遂知河陽堯佐傳以戶部侍郎知永興軍與序題合
堯佐和詩成遣稚子贊善大夫通判邠州事學古寫于此
牌歐陽集文惠神道碑銘學古虞部員外郎卽其人碑後
題聖宋景祐三年歲丙子三月清明日書又題前永興軍
節度掌書記陳諭赴閣同太常博士秘閣校理范宗傑攜

樹寺閣諭與宗傑或卽陳范兩鉅公之族屬與

衛夫人墓誌銘

正書寶元二年八月

誌題高平縣君卽左千牛衛將軍衛廷諤繼室其誌刻於
衛君誌石之陰殘缺三十餘字隴西李之才撰文云夫人
姓徐錢塘人父裕子五人口口口口殿直口口觀口皆舉
進士景祐五年春觀御試不利旣黜且以兩經禮部進名
則以州長史處之觀實預之不顧出有相謂者曰子母老
何愧易褐以怡其心觀明日反有就意夫人聞之亟走報
以書云汝年且少口爲名進士無效庸常用是觀益聞於
人攷禮部進名宋之恩例所謂特奏名也宋史選舉志景
祐初詔曰凡年五十進士五舉諸科六舉嘗經殿試進士

三舉諸科五舉預先朝御試雖試文不合格毋輒黜皆以
名聞是觀兩經禮部進名得預釋褐其邀恩數當沿于此
及後蘇軾孔文仲言舊制禮部已奏名至御試而黜者甚
多嘉祐始盡賜出身益與誌文徵信也之才字挺之宋史
有傳嘗調孟州司法參軍意觀得友于挺之爲其母作誌
有由然矣

陳述古題名

寶元二年九月在濟源

右陳述古題名文自左行云太平興國六年先祖太師中
令秦國公宰邑茲上時孟父中令大人太尉相公季父太
尉康肅公並肄業精舍祥符九年孟父中令公引罷樞府
相國出判三城天聖六年述古倅白波曹口與仲弟殿省

丞求古師之同遊今忝運局使領之任率前淮安從事尹
宗濟載之前三堂盧川令韓襲紹先專謁靈祠復此憩止
稚子祝史知雄知方知白守芸校知十已下六人時寶元
己卯登高前五日尙書金部員外郎陳述古行之題下又
有小字題云後治平丙午歲重五日男將仕郎守孟州濟
源縣尉知素立石按述古爲堯佐子此題稱大人太尉相
國者堯佐也堯佐與兄堯叟弟堯咨並肄業精舍卽謂濟
源之延慶寺今見有留題石刻詩范伯純記延慶精舍故
潁川密相以昔先中令曾製錦是邑與參預貳卿及天雄
故帥俱肄業於寺者是也題稱伴白波漕按今孟縣西南
四十五里黃河北岸上大小凡三寨其下爲白坡渡當爲

宋之白波字或從土從水地實一也宋史食貨志河東陝西船運至河陽措置陸運意其時白波在河陽之西水勢湍急牽挽艱澁更置遞運故立漕司於此今檢富紹庭傳提舉三門白波輦運李伯宗傳提舉白波輦運薛弼傳改三門白波輦運是其事也求古見李淑傳淑初在鄭州作周陵詩國子博士陳求古以私隙訟其譏訕朝廷又述古亦運局劉几傳轉運使陳述古攝渭帥卽此題運局使領也

李惟賢北嶽題名

右題名正書文云持父中山太守改威德軍留後誥命至恭謁真祠康定元年十一月十一日閤門通事舍人勾當

御厨李惟賢記弟惟賢書宋史地理志定州政和三年升
爲府改賜郡名曰中山此題當康定元年未名中山也文
人喜以古地名易之耳然後曰改賜之議起于此矣感德
軍卽耀州太平興國初改名太守亦倣古職名自署惟賢
見李昭亮傳子惟賢字寶臣以父蔭爲三班奉職後爲閤
門祇候通事舍人此題閤門通事舍人與史合又昭亮歷
知瀛定二州感德軍節度觀察留後故云中山太守也惟
賢亦昭亮子而傳未之附從畧也

朝城縣孔子廟記

八分書慶歷四年五月

朝城縣孔子廟記前題建康劉之圖言三艘王樂書太原
霍處鈞篆額記後列文林郎守縣尉樂令德文林郎守主

簿張仲華承奉郎守著作佐郎知縣事田諒諸人銜名諫
嘗爲令朝城興建孔子廟而當時爲敘其事予約斯文有
云大丞相文正王公出鎮於魏魏博之學始有口焉慶歷
壬午之紀著作佐郎田君諒爲魏朝城事之初年卽召民
興學於是畢力以致讜然告成壬午之紀慶歷二年也又
云田君青之有口者口嘗與天章侍講趙君師民講學於
青時稱山東之冠立朝之賢而豪者多出門下初命永靜
軍東光主簿不鄙其俗率子弟以教之登仕籍數有焉然
則田君固號爲良吏者矣惜史不爲立傳而齊乘亦未著
名故莫知其事跡始末諒後歷官又見興州新開白水路
記題銜利州路諸州水陸計度轉運使兼本路勸農使

奉郎守尙書工部郎中充集賢校理輕車都尉賜緋魚袋
其時當嘉祐二年距慶歷壬午十有六歲矣諒於白水路
亦爲踵修實司其成蓋所在皆有績狀如此趙師民宋史
有傳云青州臨淄又遷天章閣侍講與記合

田況題名

右題名正書文云慶歷仲冬

缺二字

樞密直學士田況改命

赴涇原與弟

缺一字

同謁東都事略況除龍圖閣直學士知

成德軍徙秦州進樞密直學士知渭州宋史地里志渭州
舊置涇原路經略安撫使故況以渭州有涇原之目矣然
自稱改命其由秦州而徙渭與至云慶歷仲冬紀時而不
紀年所未詳也

韓魏公北嶽題名

右題名在魏公所書碑陰首三行大字徑二寸餘文云皇祐元年冬十月九日重修嶽祠畢功既勒文以謹其事乃列將佐官屬名氏于石陰庶永後觀亦魏公自書記後列將佐官屬名氏分三層字寸餘非魏公書矣第一層文林郎守冀州武邑縣令管勾定州路安撫司機宜文字陳薦入內內侍省內侍高品真定府定州等路走馬承受公事陳謝禹珪西頭供奉官真定府定州等路走馬承受公事陳有方供備庫副使定州路駐泊兵馬都監趙滋供備庫副使定州路駐泊兵馬都監張候西深院使資州刺史定州路駐泊兵馬鈐轄張忠北作坊使綿州團練使內侍省內

侍右班副都知定州路駐泊兵馬都監任守忠侍衛親軍
馬軍副都指揮使保大軍節度觀察留後定州路駐泊馬
步軍副都部署狄青第二層順安軍判官將仕郎試秘書
省校書郎權節度觀察推官公事仇公綽莫州防禦推官
將仕郎試秘書省校書郎權觀察推官周革節度推官承
奉郎試大理評事劉循將仕郎試秘書省校書郎權節度
掌書記馬良器內殿崇班定州兵馬都監兼在城巡檢劉
斌內殿崇班定州兵馬都監兼在城巡檢劉宜孫內殿崇
班定州駐泊兵馬都監石宗閔朝奉郎太常博士通判定
州軍州兼制置營田及管內勸農事騎都尉借緋錢貽範
朝奉郎尚書屯田員外郎通判定州軍州制置營田及管

內勸農事騎都尉賜緋魚袋游開第三層將仕郎守曲陽
縣尉盧至堅將仕郎守曲陽縣主簿李柔左班殿直知曲
陽縣事兼兵馬堅押口昭文林郎守司法叅軍房士安將
仕郎守司戶叅軍裴士謬登仕郎守司理叅軍趙諮承奉
郎守錄事叅軍曹盡忠按碑記定州一路官屬之制証以
宋史職官志走馬承受諸路一員此設二員却掃編祖宗
時諸路帥司皆有走馬承受公事二員一使臣一宦者屬
官也今碑謝禹珪爲宦者陳有方爲使臣亦與舊制合則
史攷之不審矣

文獻通考走馬承受諸路各一員宋仁宗
時置以三班使臣及內侍充亦未盡然

通判當建隆時大郡置二員餘置一員定州路屬大郡題
名通判有二員與志合在城巡檢二員蓋州縣所置非沿

邊及數州數縣例也史列傳陳薦字彥升從韓琦定州河東幕府此題管勾定州路安撫司機宜文字於時卽在魏公幕也守武邑縣令蓋爲華陽尉獲盜後轉官而史失書矣張忠史有二人一字聖毗一不書字皆開封人此題卽傳不書字者傳云遷如京使資州刺史歷真定府定州高陽闕京東西路兵馬鈐轄亦見郭勣傳韓琦言勸所遣將張忠劉遵平賊功皆第一者是其人也趙滋本傳云自東頭供奉官超受供備庫副使定州路駐泊都監任守忠見宦者傳云以功再遷東染院使內侍押班出爲定州鈐轄加內侍副都知按題名則爲北作坊使出爲轄又爲內侍右班非押班也狄青傳云徙真定路副都總管歷保大安

遠二軍節度觀察留後又遷馬軍副都指揮使据此題爲
定州路時已帶馬軍副都指揮保大軍銜傳敘在定州路
以後歷官少失其次故備錄之

重修北嶽廟記

正書皇祐二年
正月在曲陽

記爲魏公撰并書約其文有云每歲立冬天子以所署祝
冊就遣守臣以祇祀事與禮志立冬祀北嶽恒山合又記
稱慶歷八年夏六月琦獲領州事本傳云知定州兼安撫
使是也然傳未明其請外之歲月今以碑証之並知其實
矣修廟與事者通判軍州事屯田員外郎游開縣主簿李
奕碑末結銜署名朝奉郎太常博士通判定州軍州兼制
置營田及管内勸農事上騎都尉借緋錢貽範篆額

趙滋北嶽題名

右題名正書文云皇祐三年正月二十七日奉安撫移文詣北嶽靈宇點檢未完之處二月朔日還郡西京左藏庫副使定州路監兵趙滋記滋見韓魏公嶽廟碑陰題蓋當皇祐二年爲供備庫副使定州路駐泊兵馬都監至三年又遷西京左藏庫副使矣滋本傳未之書也職官志西京南京北京各置左藏庫題名與志合監兵當爲都監易名所云奉安撫移文詣北嶽靈宇點檢未完之處蓋元年重修至此又檢視爾

王鼎北嶽題名

右題名別鐫一小碑式用花文邊欄額題王公題名親筆

下書皇祐庚寅三月十三日庚子奉勅以久旱乘驛請雨于北獄甲辰離京是夜雨二尺壬子宿齋宮以二十八日乙卯祭告甲寅復被詔饗謝越四月五日辛酉行禮宣德郎守尙書屯田員外郎騎都尉賜緋魚袋王鼎謹記按庚寅爲皇祐二年以仁宗紀考之是年三月甲午遣官祈雨丙午雨据題名則庚子請雨至甲辰夜已雨矣王鼎史有傳云累遷太常博士提點兩浙刑獄降知深州徙建州提點河北刑獄召爲開封府判官改鹽鐵判官累遷司封員外郎淮南兩浙荆湖制置發運副使入爲三司鹽鐵副使遷刑部郎中天章閣待制河北都轉運使徙河東卒然于守尙書屯田員外郎不書蓋略之也鼎強果自任號爲名吏今得其

手筆自題益足珍惜也

李杞題名

右題名正書文云華州渭南縣主簿權華陰縣事李杞伏
謁靈祠皇祐辛卯仲冬初二日題辛卯皇祐三年也宋史
食貨志王韶建開湟之策委以經畧熙寧七年始遣三司
幹當公事李杞入蜀經畫買茶於秦鳳熙河博馬八年杞
以疾去今題名者卽其人又文同丹淵集呈李堅甫中舍
杞詩云因君奉使臨敝邑與可蜀之梓州人此正其入蜀
時也益可舉証

劉兼濟北嶽題名

右題名正書文云皇祐辛卯仲冬後十日因往邊部巡歷

專詣聖祠朝拜河北沿邊安撫副使西上閤門使惠州刺史劉兼濟題男殿直振孫試校書郎詵孫侍行宋史列傳兼濟劉平弟云累遷文思副使惠州刺史河北緣邊安撫副使擢西上閤門使與題名合其男振孫詵孫史未之紀也

蘇舜元題名

右題名正書字大三寸文云蘇舜元才翁題又字兩行文不全唯皇祐癸巳孟春

缺

因之河南府也癸巳爲仁宗改

元皇祐之五年舜元附宋史蘇舜欽傳後云兄舜元字才翁爲人精悍任氣節爲歌詩亦豪健尤善草書舜欽不能及官至尙書度支員外郎三司度支判官

東都事畧郭承祐傳稱轉運使

蘇舜

元 今此題所書勁折不佻以証史言善草書洵爲非誣
陸務觀過羅源縣走馬嶺見崖石刻才翁書樹石二大字
告縣令作欄楯護之其書爲當時所貴如此况傳之積歲
益久如予所收者是尤可寶愛也

京兆府小學規

裴珍正書至和元年四月在西安府學

碑稱准使帖指揮于宣聖廟內置立小學於生徒內選差
學長二人至四人傳授諸生教業及點檢過犯其諸生學
課分爲三等又懲其過犯竝量事大小行罰攷之宋史職
官志國子監小學置職事教諭二人掌訓導及考校責罰
學長二人掌序齒位糾不如儀者今碑內所舉規式并依
國子監制度蓋由慶歷四年詔諸路州軍監各令立學于

是當路體其意復以小學建置故碑稱准使帖也是時任
使職者爲文路公然則京州府小學路公實爲之倡而史
不及載也碑後列權府學教授蒲宗孟本傳畧其任此職
又列府學說書兼教授裴演職官志淳化五年判監李至
奏爲直講以京朝官充其後又有講書說書之名並以幕
職州縣官充此刻稱說書則府學亦置員矣史文所未詳
碑足以拾其遺也又列大理寺丞簽署觀察判官廳公事
專管勾府學李縱篆額秘書丞通判軍府兼管內勸農事
提舉府學韓繹繹忠獻子見韓億傳後又列尙書比部員
外郎通判軍府兼管內勸農事提舉府學薛侔江隣幾雜
志所稱薛侔比部者卽其人又大書列忠武軍節度使特

進檢校大尉知軍府事文氏而不名知爲謬公也本傳改忠武軍節度使知永興軍至于階特進及加檢校史畧而不書又列本學教授兼說書草澤任民師志載慶歷四年始置教授委運司及長吏于幕職州縣內薦或本處舉人有德執者充民師稱草澤當以舉人膺薦而自爲別異使世知非由幕職州縣者爾

授堂金石文字續跋卷九終

受業汝陽李應雷校